

Ugovori o izvršavanje rada za opće dobro na slobodi u Kantonu Sarajevo Period 2020. - 2021. godina – Saopštenje za WEB

Ministarstvo pravde i uprave Kantona Sarajevo, za period 06. maj 2020. - 06. maj 2021. godine, sklopilo je ugovore sa KJKP Rad, KJKP Gradski saobraćaj, KJKP Park, KJKP Pokop i Humanitarnom organizacijom Udruženje Pomozi.ba, koji predviđaju ukupno 30 radnih mjesta za izvršavanje rada za opće dobro na slobodi.

Ovim ugovorima su definisana međusobna prava i obaveze ugovornih strana, a na osnovu kojih se osobe kojima je izrečena alternativna krivična sankcija rad za opće dobro na slobodi, upućuju na izvršavanje sankcije.

U skladu sa odredbama člana 44. stav 7. Krivičnog zakona Federacije Bosne i Hercegovine, („Službene novine Federacije Bosne i Hercegovine“, broj: 36/03, 37/03, 21/04, 69/04, 18/05, 42/10, 42/11, 59/14, 76/14, 46/16, 75/17), raspoređivanje na rad za opće dobro na slobodi u smislu vrste i radnog mjesta, obavlja Ministarstvo pravde i uprave Kantona Sarajevo, prema mjestu prebivališta, odnosno boravišta osuđenika, vodeći računa o njegovim sposobnostima i znanjima.

Rad za opće dobro na slobodi, izvršava se u organizacijama od javnog interesa osnovanim na području Kantona Sarajevo, a koje obavljaju javnu djelatnost u okviru koje se može ostvariti opća i posebna svrha izvršavanja krivično-pravnih sankcija.

Ove organizacije, čiju listu nakon izvršenih konsultacija, utvrđuje Ministarstvo pravde i uprave Kantona Sarajevo, predstavljaju poslodavca u postupku izvršavanja rada za opće dobro na slobodi, s kojim se potpisuju ugovori o izvršavanju rada za opće dobro na slobodi, a koji ugovori imaju jednogodišnji rok važenja.

Osobe koje se upućuju na izvršavanje rada za opće dobro na slobodi, obavljaju poslove u nadležnosti privrednog društva u koje se upućuju na izvršavanje ove alternativne krivične sankcije, u dnevnom trajanju radnog vremena privrednog društva u koje su upućene na izvršavanje rada za opće dobro na slobodi.

Neposredan nadzor nad izvršavanjem rada za opće dobro na slobodi u kantonalnim javnim komunalnim preduzećima i humanitarnoj organizaciji, obavljaju uposlenici ovih pravnih osoba - povjerenici za obavljanje rada za opće dobro na slobodi.

Svi povjerenici za izvršavanje rada za opće dobro na slobodi, prošli su posebnu obuku u Ministarstvu pravde i uprave Kantona Sarajevo, u skladu sa odredbama Uputstva o načinu rada, odgovornosti i obučavanju povjerenika, („Službene novine Kantona Sarajevo“, broj: 28/10).

Posebno ističemo izuzetnu društvenu odgovornost navedenih kantonalnih javnih komunalnih preduzeća i humanitarne organizacije, uključenih u ovaj program, ogroman angažman uprava, povjerenika za izvršavanje rada za opće dobro na slobodi i svih ostalih uposlenika, te prepoznavanje društvenog značaja izvršavanja rada za opće dobro na slobodi.